

Ո Ր Ո Շ ՈՒ Մ թիվ - 115  
**Վարչական տույժ նշանակելու մասին**

«19» ապրիլի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով «ԱՅ ՎԵՅՓ» ՍՊԸ տնօրեն Ռոման Կիրակոսյանի վերաբերյալ նյութերը.

**Պ Ա Ր Զ Ե Ց Ի**

2022 թվականի փետրվարի 11-ին ՀՀ ՊԵԿ հետբացթողումային հսկողության վարչության աշխատակիցները իրականացրել են կամերալ մաքսային ստուգում «ԱՅ ՎԵՅՓ» ՍՊ ընկերությունում՝ 11.02.2022 թ. թվականի թիվ 05100011/110222/0004798 ապրանքների հայտարարագրով հայտարարագրված ապրանքների մաքսային արժեքի և քաշերի հայտարարագրման ճշտությունը պարզելու համար:

ՀՀ ՊԵԿ ՀՀՎ-ի 10.03.2022 թ. թիվ /9-4/15476-2022 գրությամբ պահանջվել է սահմանված ժամկետում ներկայացնել ապրանքների հայտարարագրված գների վերաբերյալ հիմնավորող փաստաթղթեր և (կամ) տեղեկություններ, այդ թվում՝ գրավոր պարզաբանումներ, որոնք նախատեսված են ԵՏՀ կոլեգիայի 27.03.2018թ. N42 որոշման 1-ին կետով հաստատված՝ «Եվրասիական տնտեսական միության մաքսային տարածք ներմուծվող ապրանքների մաքսային արժեքի մաքսային հսկողություն իրականացնելու առանձնահատկությունների մասին» հիմնադրույթներով:

Ընկերությանը ծանուցվել է մաքսային մարմնի օրինական պահանջի մասին, սակայն սահմանված ժամկետում չի ներկայացրել ապրանքների հայտարարագրված գների վերաբերյալ հիմնավորող որևէ փաստաթուղթ և (կամ) տեղեկություն, ինչպես նաև չի կատարել մաքսային մարմնի օրինական պահանջը:

Փաստի առթիվ «ԱՅ ՎԵՅՓ» ՍՊԸ տնօրեն Ռոման Կիրակոսյանի նկատմամբ ՀՀ մաքսային օրենսգրքի 190-րդ և 194-րդ հոդվածների հատկանիշներով կազմվել է մաքսային կանոնների խախտման վերաբերյալ արձանագրություն՝ մաքսային մարմնի պաշտոնատար անձի օրինական պահանջը չկատարելու և սահմանված ժամկետում մաքսային հսկողության համար անհրաժեշտ փաստաթղթերը և տեղեկությունները չներկայացնելու համար:

«ԱՅ ՎԵՅՓ» ՍՊԸ տնօրեն Ռոման Կիրակոսյանը հրավիրվել է վարչական վարույթի մասնակցության, վերջինս ծանուցվել է, սակայն չի ներկայացել:

ԵԱՏՄ մաքսային օրենսգրքի 340-րդ հոդվածի 6-րդ կետի համաձայն՝ հայտարարատուն, (...) և այլ անձինք պարտավոր են մաքսային մարմիններ ներկայացնել մաքսային հսկողության իրականացման համար անհրաժեշտ փաստաթղթերը և (կամ) տեղեկությունները՝ բանավոր, գրավոր և (կամ) էլեկտրոնային տարբերակներով: Օրենսգրքի 84-րդ հոդվածի համաձայն՝ հայտարարատուն պարտավոր է սույն Օրենսգրքով նախատեսված դեպքերում մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր: Հոդվածի 3-րդ կետի համաձայն՝ հայտարարատուն, անդամ պետությունների օրենսդրությանը համապատասխան, պատասխանատվություն է կրում նույն հոդվածի 2-րդ կետով նախատեսված պարտականությունները չկատարելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և

տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 190-րդ և 194-րդ հոդվածները սահմանում են պատասխանատվություն մաքսային մարմնի պաշտոնատար անձի օրինական պահանջը չկատարելու, ինչպես նաև սահմանված ժամկետում մաքսային հսկողության համար անհրաժեշտ փաստաթղթեր և տեղեկություններ չներկայացնելու համար:

Ռոման Կիրակոսյանը 2022 թվականի ապրիլի 19-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 190-րդ և 194-րդ հոդվածների հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ Ռոման Կիրակոսյանը չի կատարել ՀՀ ՊԵԿ 10.03.2022 թվականի թիվ /9-4/15476-2022 գրությամբ ուղարկված մաքսային մարմնի օրինական պահանջը և մաքսային հսկողություն իրականացնելու համար սահմանված ժամկետում չի ներկայացրել ապրանքների վերաբերյալ անհրաժեշտ փաստաթղթերը և տեղեկությունները, այսինքն՝ վերջինս թույլ է տվել ՀՀ մաքսային օրենսգրքի 190-րդ հոդվածի 1-ին մասով և 194-րդ հոդվածով նախատեսված մաքսային կանոնների խախտումներ, ինչը հիմնավորվում է ՀՀ ՊԵԿ հետբացթողումային հսկողության վարչության 10.03.2022 թվականի թիվ /9-4/15476-2022 գրությամբ և նշված գրության ստացման վերաբերյալ հետադարձ ծանուցմամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 190-րդ հոդվածի 1-ին մասով և 194-րդ հոդվածով, 206-րդ և 221-րդ հոդվածներով,


#### Ո Ր Ո Շ Ե Ց Ի՝

1. «ԱՅ ՎԵՅՓ» ՍՊԸ-ի տնօրեն Ռոման Կիրակոսյանին ճանաչել զանցառու ՀՀ մաքսային օրենսգրքի 190-րդ հոդվածի 1-ին մասով և նրան տուգանել 10000 ՀՀ դրամ: /900005024055 (կող-19) հաշվեհամարին/

2. Ռոման Կիրակոսյանին ճանաչել զանցառու ՀՀ մաքսային օրենսգրքի 194-րդ հոդվածով և նրան տուգանել 50000 ՀՀ դրամ: /900005024055 (կող-19) հաշվեհամարին/

3. Որոշման մասին հայտնել Ռ. Կիրակոսյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ  
ՎԱՐՉՈՒԹՅԱՆ ՊԵՏ՝



Ա. ՄՆԱՑԱԿԱՆՅԱՆ